

Հաստատված է՝
Հայաստանի Հանրապետության
փաստաբանների պալատի խորհրդի
11.04.2016թ. թիվ 10/4-Լ որոշմամբ

Խորհրդի նախագահ՝
Արա Զոհրաբյան

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՓԱՍՏԱԲԱՆՆԵՐԻ ՊԱԼԱՏԻ ԽՈՐՀՐԴԻՆ ԱՌԸՆԹԵՐ
ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ

Կ Ա Ն Ո Ն Ա Կ Ա Ր Գ

ՆՈՐ ԽՄԲԱԳՐՈՒԹՅԱՄԲ

I. ԸՆԴՀԱՆՈՒՐ ԴՐՈՒՅԹՆԵՐ

1. Հայաստանի Հանրապետության փաստաբանների պալատի (**այսուհետ՝ Պալատ**) խորհրդին առընթեր գիտավերլուծական կենտրոնի (**այսուհետ՝ Գիտավերլուծական կենտրոն**) կանոնակարգը սահմանում է Գիտավերլուծական կենտրոնի գործունեության կարգը, ինչպես նաև համակարգողին և փորձագետներին նշանակելու կամ ազատելու հետ կապված հարաբերությունները:
2. Գիտավերլուծական կենտրոնը Պալատի խորհրդին առընթեր խորհրդակցական մարմին է և չի հանդիսանում Պալատի ստորաբաժանում:

II. ԳԻՏԱՎԵՐԼՈՒԾԱԿԱՆ ԿԵՆՏՐՈՆԸ

3. Գիտավերլուծական կենտրոնը՝
 - Հայաստանի Հանրապետության սահմանադրական դատարանի կողմից քննության ընդունված և Պալատին տրամադրված գործերով ներկայացնում է երրորդ կողմի կարծիք (amicus curiae).
 - Մարդու իրավունքների եվրոպական դատարանում կամ այլ միջազգային դատարանում քննվող գործերով, ըստ անհրաժեշտության, ներկայացնում է երրորդ կողմի կարծիք (amicus curiae).
 - Պալատի նախագահի կամ խորհրդի առաջարկով ներկայացնում է որևէ իրավական ակտի կամ իրավական ակտի նախագծի վերաբերյալ գրավոր կարծիք (մեկնաբանություն).
 - Պալատի նախագահի կամ խորհրդի առաջարկով ներկայացնում է փաստաբանական գործունեությանն առնչվող իրավական բնույթի հարցի վերաբերյալ գրավոր կարծիք (մեկնաբանություն).
 - Պալատի նախագահի կամ խորհրդի առաջարկով մշակում է գիտամեթոդական ձեռնարկներ:

III. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ

4. Գիտավերլուծական կենտրոնի աշխատանքները համակարգում է Գիտավերլուծական կենտրոնի համակարգողը:
5. Գիտավերլուծական կենտրոնի համակարգողին երկու տարի ժամկետով նշանակում է Պալատի խորհուրդը՝ Պալատի նախագահի ներկայացմամբ:
6. Գիտավերլուծական կենտրոնի աշխատանքներին մասնակցելու համար կարող են հրավիրվել իրավունքի տարբեր բնագավառների մասնագետներ, փաստաբաններ, այլ իրավաբաններ և իրավապաշտպաններ (**այսուհետ՝ փորձագետներ**), որոնք կարող են

կատարած աշխատանքի համար վարձատրվել Գիտավերլուծական կենտրոնի համար ստացված ֆինանսական միջոցներից:

7. Գիտավերլուծական կենտրոնի գործունեության հետ կապված ծախսերը (այդ թվում՝ համակարգողի վարձատրությունը) կատարվում են Պալատի բյուջեի հաշվին: Գիտավերլուծական կենտրոնի աշխատանքների ֆինանսավորման համար Պալատը կարող է ստանալ դրամաշնորհներ, նվիրատվություններ և այլ՝ օրենքով չարգելված ֆինանսական միջոցներ:
8. Գիտավերլուծական կենտրոնի աշխատանքները կարող են լուսաբանվել զանգվածային լրատվության միջոցներով:
9. Գիտավերլուծական կենտրոնը կարող է ինչպես Հայաստանի Հանրապետությունում, այնպես էլ այլ երկրներում գործող հասարակական, գիտական, գիտահետազոտական կազմակերպությունների, փորձագիտական կենտրոնների, ուսումնական հաստատությունների, փաստաբանական կառույցների և դրանց համապատասխան ստորաբաժանումների հետ կապեր հաստատել՝ համագործակցության նպատակով:

IV. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ՀԱՄԱԿԱՐԳՈՂԻ ԼԻԱԶՈՐՈՒԹՅՈՒՆՆԵՐԸ

10. Գիտավերլուծական կենտրոնի համակարգողը՝
 - կազմակերպում է փորձագետների միջև աշխատանքի բաժանումը և համակարգում է նրանց աշխատանքները.
 - ապահովում է Գիտավերլուծական կենտրոնին հասցեագրված գրությունների (հանձնարարությունների, առաջարկությունների) ընթացքը.
 - ներկայացնում է Գիտավերլուծական կենտրոնի գործունեության տարեկան հաշվետվությունը.
 - ստորագրում է Գիտավերլուծական կենտրոնի անունից ելքագրվող փաստաթղթերը.
 - իրականացնում է սույն կանոնակարգով նախատեսված այլ լիազորություններ:

V. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ՀԱՄԱԿԱՐԳՈՂԻ ԼԻԱԶՈՐՈՒԹՅՈՒՆՆԵՐԻ ԴԱԴԱՐԵՑՄԱՆ ԿԱՐԳԸ

11. Գիտավերլուծական կենտրոնի համակարգողի լիազորությունները վաղաժամկետ կարող են դադարեցվել Պալատի նախագահի կամ Խորհրդի նախաձեռնությամբ, ինչպես նաև համակարգողի կողմից այդ մասին Պալատի նախագահին գրավոր դիմում ներկայացնելու դեպքում:
12. Համակարգողի լիազորությունները համարվում են դադարած Պալատի Խորհրդի որոշման կայացման պահից, իսկ սույն Կանոնակարգի 11-րդ կետում նշված դեպքում՝ դիմում ներկայացնելու հաջորդ օրվանից:

VI. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ԿԱԶՄԸ

13. Գիտավերլուծական կենտրոնն իր աշխատանքները կազմակերպում է մշտական կամ ժամանակավոր փորձագետների ներգրավման միջոցով:
14. Փորձագետներին նշանակում կամ ազատում է Պալատի նախագահը:

VII. ԵԶՐԱՓԱԿԻՉ ԴՐՈՒՅԹՆԵՐ

15. Սույն կանոնակարգն ուժի մեջ է մտնում 2016 թվականի ապրիլի 12-ից:
16. Գիտավերլուծական կենտրոնի նշանակված համակարգողը շարունակում է իր լիազորություններն իրականացնել մինչև 2018 թվականի ապրիլի 12-ը:
17. Գիտավերլուծական կենտրոնի մյուս անդամների լիազորությունները համարվում են դադարեցված 2016 թվականի ապրիլի 12-ից:
18. Սույն կանոնակարգում փոփոխություններ և (կամ) լրացումներ կարող են կատարվել միայն Պալատի խորհրդի որոշմամբ: